

# UMK anjur Program Jom Ceria dan Indahkan Pantai Kita

Oleh : Siti Nor Aishah binti Mohammad

Gambar : Al Azam Razi

Hebahan : [Berita@umk.edu.my](mailto:Berita@umk.edu.my)



UNIVERSITI Malaysia Kelantan (UMK) menganjurkan Program Jom Ceria dan Indahkan Pantai Kita bagi melahirkan siswa Institusi Pengajian Tinggi Awam (IPTA) yang bertanggungjawab dan memupuk rasa cinta terhadap komuniti serta masyarakat setempat.

Timbalan Menteri Kewangan, YBhg. Senator Dato' Dr. Awang Adek bin Hussin, berkata, penubuhan sebuah institusi pengajian tinggi seperti UMK bukan sahaja untuk melahirkan modal insan dan pewaris kepada Negara tetapi turut sama terlibat dalam memajukan masyarakat di kampung-kampung serta di desa-desa.

Beliau berkata, inilah betapa pentingnya penubuhan sebuah IPTA yang boleh memberi impak kepada ekonomi dan sosial yang kita sangat-sangat perlukan.

"Hari ini kita dapat dilihat dengan negara Malaysia di antara negara yang terbaik di dunia serta tanpa perlu ada perasaan malu untuk saya menyatakannya," katanya.



Beliau berkata demikian pada Program Sukarelawan Mahasiswa UMK, University Community Transformation Centre (UCTC), di Pantai Melawi, Bachok, Kelantan, pada 30 April 2013.

Menurut Dato' Dr. Awang Adek, adalah menjadi satu hakikat dan realiti di mana dunia hari ini berhadapan dengan krisis ekonomi.

"Pemerintahan negara di bawah kepimpinan Perdana Menteri kita melalui program transformasi ekonomi, sosial dan politik telah mencatat pertumbuhan ekonomi yang begitu baik di peringkat dunia dengan jumlah 5.6 peratus pada tahun lepas," katanya.

Sementara itu, Naib Canselor UMK, YBhg. Prof. Datuk Dr. Raduan bin Hj. Che Rose berkata, adalah menjadi teras universiti bahawa kewujudan universiti seharusnya mendekati rakyat dan masyarakat menerusi aktiviti atau program sukarelawan seperti ini.

Jelas beliau, dengan rasa penuh tanggungjawab dan amanah pihak UMK akan sentiasa melaksanakan program-program yang mendekati masyarakat setempat dengan pengisian yang memberi manfaat serta kepentingan kepada mereka dari semasa ke semasa.

"Saya percaya YB. Dato' Dr. Awang Adek akan sentiasa memberi sokongan kepada UMK melalui program-program yang telah kita laksanakan. Insyallah, kita akan dapat meneruskan kesinambungan, kesejahteraan dan pembangunan universiti ini dengan sokongan oleh beliau," ujarnya.

